

1 PETER

Anparnintja

¹ Yinga nama Peter, Jesua Kristaka apostle. Atha pepa nhanha relha rrakangkarurna yairnama, rrangkarrala pmara Pontus-ala, pmara Galatia-ala, pmara Cappadocia-ala, pmara Asia-ala, pmara Bithynia-ala turta namanga. Rrangkarra kunha pmara nhanhala ankealtha wara nama, pmara kutatha rrakangkarra alkirala namanga warta.

Altjirra Kaartala rrangkarranha urrarakakuriltja nitjika, ² era arrkurla kuta kaltjanakalanga rrangkarra Jesua Kristanha tnakitjinala. Era turtantama rrangkarranha alknaltarilaka Enka ekuranharlarlangu, rrangkarra Jesua Kristaka kangkwerritjinanga. Era turta rrangkarranha Jesua Kristaka alhwala urrurnaka.

Altjirranha rrakangkarra ngwanga inthorra, rilhera inthorra turta ntelalhama.

Peter-ala Altjirranha dangkilaka. Era turta tnakanhakanha ntjarranha ilaka etna tnoatnoa kuta Kristaka kaaralhitjika

³ Atha Altjirranha tnantjama, Ingkarta nurnaka Jesua Kristaka Kaartanha. Nurnaka montjamontja inthorra ntelalhamala, era nurnanha lyartinyilaka. Era Jesua Kristanha relha errilknga ntjarranga kamalhelaka. Lakinhangana nurna tnoatnoa kaaralhama anma Altjirralela

ngampakala etatha nitjika, pmara ekuranhala.
⁴ Altjirrala pmara ekuranha marra ntarntarama. Arrpunhalantama pmara erinha yarna ilpatuma. Pmara era turta yarna kornerrama, yirrama paka. Pmara era kutatha nitjina, nurna turta ekururna anma irrputjina.

⁵ Rrangkarra Altjirranha tnakamanga warta, era rrankarranha tnyinitjina kuta, rrankarra Jesua Kristaka kaaralhamalanga, pitjalputjika. Kurunga Jesua Kristanha pitjalpumalanga, relha ingkarrakala aritjina era rrankarranha tangkalhelakala.

⁶ Nhanhaka kaltja namala, rrankarra kala arrkana nitjika, etna rrankarranha lyarta rrukunthakunthilamangalka.

⁷ Nhanha kunha kala lakinha nitjika, Altjirrala aritjinanga rrankarra paka erinha nthurpa tnakamanga. Arai, etna rrankarranha rrukunthakunthilamalanga, nhanha kala nama nhanga relhalala gold urala ilknngimanga ngerra. Rrankarrantama Jesua Kristanha kuta tnakamanga, era rrankarranha kngarra inthorra tnantjitjina, era pitjalpumalanga. Jesua Kristanha kuta tnakitjika, nhanhataka tjiparralkura nama gold-angatjina. Gold turta kunha Altjirrala anma yirralhelitjinantema.

⁸ Rrangkarra Jesua Krista erinha itja alkngala araka paka. Rrangkarra pula ekura kangkama. Rrangkarra erinha lyarta turta itja arama paka. Rrangkarra pula erinha tnakama. Rrankarrantama arrkana inthorra nama, ⁹ rrankarra kaltjanga warta, rrankarra Altjirralela ngampakala etatha nitjinala.

¹⁰ Tjina ntjarrai, Altjirraka urrpia imankinya ntjarrala ilaka, Altjirranha rrakangkarra anma ngwanga ntelalhitjinala. Urrpia etnantama pmarralhaka, Altjirranha turta pmarralanaka, ¹¹ “Relha ngunhanhama unta yairnitjina relha ntjarranha tangkalhelitjika? Ilangara inthorra turtama unta relha ntjarranha tangkalhelitjina?” Kristaka Enka urrpia imankinya nhanha etnakalela naka. Enka erantama etnanha ilaka Kristanha nyingalauwutjinala, kurunga Altjirrala erinha ingkairnitjinala relha ingkarrakaka Ingkarta nitjika. ¹² Enkala turtantama urrpia imankinya nhanha etnanha ilaka, yia nhanha rrakangkarra namanga, itja etnaka. Ngurrukalkurantama Altjirrala Enka Alkngaltara erinha alkiranga yairnaka. Enka erantama relha urrputja urraraka, etnanha rrakangkarrurna yairnaka turta, rrangkarranha Yia Marra erinha kaltjinthitjika. Lyarta rrangkarra Yia Marra erinha kala wukantama, yia nhanga angel ntjarrala turtala wutjika antja nakala.

Tnakanhakanha ntjarra alkngaltara ntelalhitjika

¹³ Nhanhakakwa rrangkarra thakerritjika ar-ratjanta eterritjika. Rrangkarra itja kunpakunperritjika. Rrangkarra pula kaaralhitjika, nyinta nhanhakanta eterramala. Jesusa Kristanha pitjalpumalanga era rrangkarranha Altjirraka pmara kutathurna kngetnitjina. ¹⁴ Arrkurla nhanga, rrangkarra Kristaka kotnarrkantema namalanga, rrangkarra lherrintja korna rrakangkarranhaka kangkwerritjata.

Lyarta kala Altjirrakantantama kangkwerrai, katjia ilporathala kaartu etnakanhaka kangkwerramanga ngerra. ¹⁵ Altjirra, erala rrankarranhanha urrakakala ekuriltja nitjika, era alkn-galtara nama. Era antja nama rrankarra turta alkn-galtara nitjika. ¹⁶ Nhangha Altjirra Angkatja Imankinyala ilama, “Rrankarra alkn-galtara nitjika, yinga Altjirra alkn-galtara namanga warta.”

¹⁷ Altjirrala, Kaarta rrankangarranhanha, relha ingkarrakanhanha tjiperrawutjina, etnala ntelalhakala ngerra. Loala kuta. Lakinhanha, rrankarra ekura arratja kangkwerritjika, rrankarra alha nhanhanha ankealtha namalanga. ¹⁸ Rrankarra nhangha errilkn-gipata rrankangarranhanha mpaarangerangaka kangkwerritjata. Mpaarangeranga etna pula rrankarranhanha yarna tangkalhelaka. Altjirralantama rrankarranhanha tangkalhelaka. Era rrankarranhanha errintjanga buy-emilaka ngerra, itja pula gold-ala, silver-ala paka. ¹⁹ Era rrankarranhanha buy-emilaka ngerra Kristaka alhwala, Kristanhanha ntolkala ilumalanga. Kristanhanha kunha lamb nhangha ngerra naka, relhalala Altjirranhanha nthitjata etna korna ntelalhakalanga. ²⁰ Altjirrala alha nhanhanha itjantema arrpmarnakalanga, era kala eterraka relha ntjarranhanha Kristarlarlanga tangkalhelitjika. Era pula erinhanha ngurrukalkuranta alhurna yairnaka. ²¹ Kristarlarlanga rrankarra Altjirranhanha tnakama. Altjirra erinhanha purrama, erala Kristanhanha relha errilkn-ga ntjarranga kamalhelakala. Krista nhanhanha erinhantama

Altjirralla ingkairnakala Ingkarta relha ingkarrakaka nitjika. Lakinhangha rrankarra Altjirranha kuta tnakitjika, ekura tnoatnoa kaaralhitjika turta.

²² Rrankarra Altjirra Angkatja nthurpaka kangkwerrakalanga, Altjirralla rrankarranha alknaltarilaka. Rrankarrantama urlar-rakurlarra kangkintja inthorra ntelalhitjika, pmathakunya.

²³ Rrankarra kunha relha wotha alknerrakala nama. Arrkurla nhanga rrankarra kaarta mia rrankarranhangha alknerraka, kurrka wara etatha nitjinala. Ngurruka pula rrankarra wotha alknerraka, Altjirra angkatjarlarlangantama. Angkatja nhanhala rrankarranha kutantakala etathilaka. Angkatja era turta itja kuta yirritjina.

²⁴ Altjirra Angkatja Imankinyala ilama, “Relha ingkarraka kunha tharrka ngerra nama.

Etna turta antatha ngerra parrpa yirrama. Tharrka era imolyerrama, antatha etna turta ntjirrkerrama.

²⁵ Ingkartaka angkatja pula ngampakalala kuterrama.”

Ingkartaka angkatja nhanha kunha Yia Marra era nama. Yia Marra nhanga etnala rrankarranha kaltjinhakala erakwia.

2

Rrankarra Altjirra worla nama, worla er-arrpala urrakala

¹ Rrangkarra itja korna ntelalhitjika, relhanha orrtjapepilitjika, relhaka antjakunyerritjika, relhaka orrtjerramala angkitjika, lhurrrkurta angkitjika paka. ² Katjia nhanga lyartanta alkngerrakala kunha kutatha ipatjakanta antjerrama. Etna ngerra rrangkarra kwatja etathilanhaka kutatha antjerritjika. Kwatja etathilantha erinha ntjumala, rrangkarra Altjirranha ekarl-tamekarlita tnakitjina. ³ Rrangkarra kala kwatja etathilantha erinha arrkarnaka. Lakinhangar rangkarra kaltja Altjirranha nurnaka kangkintja inthorra ntelalhamanga.

⁴ Kala Kristurna pitjai. Krista era ilthaka foundation ngerra nama. Relha arrpunha ntjarra Kristaka antjakunya naka. Altjirrala pula erinha urrarakala. Altjirranga urlarra era tjiparra nama. ⁵ Rrangkarra parta ngerra nama. Altjirrala turta rrankarranha foundation nhanhaka parnama ngerra. Rrankarrantama Altjirraka iltha ngerra nama. Rrangkarra turta Altjirraka priest alknngaltara ntjarra nama. Rrankarrantama Jesua Kristarlarlanga Altjirranha tjauwerrilya nthama, rrangkarra Altjirraka arratja kangkwerramalanga. Tjauwerrilya nhanhaka Altjirranha kangkama. ⁶ Altjirraka Angkatja Imankinyala ilama,

“Arai, atha Zion-ala ilthaka foundation tjiparra arrarnama, foundation atharrpa urrarakala. Relha era, erala erinha tnakamanga, arrpunhala erinha itja kuta nakapakarlilitjina.”

⁷ Foundation nhanha Krista era nama. Rrangkarrala Kristanha tnakama, rrankangkarra era tjiparra nama. Relha arrpunha ntjarrala Kristanha itjala tnakama. Etnakiperra Altjirraka Angkatja Imankinyala ilama, “Ilthaka foundation ekurala iltha parnanha ntjarra antjakunya nakala, era kunha foundation arratja era kuta nama.” ⁸ Nhanha turta, “Ilthaka foundation nhanha aramala, arrpunha ntjarra ekura antjakunyerrama. Erinha itja tnakamala, etna kornilalhama.”

Relha etnala Kristanha itja tnakama, etna Altjirraka angkatjaka turta itja kangkwerrama. Altjirranha imankantema angkaka etna kornilal-hitjinala.

⁹ Altjirralla pula rrankarranha urraraka worla ekuranha nitjika, priest ekuranha inthorra turta. Era rrankarranha urraraka relha alkn-galtara nitjika, tjiparra inthorra turta. Iwunhanga? Rrangkarra relha ntjarranha ilitjina, era rrankarranha tangkalhelakala. Arai, imanka rrankarra tjaiya paalala lhamalanga, rrankarra thapathapala ngerra naka. Lyarta, tjaiya arratjala lhamala, rrankarra Altjirraka parrtjalantama nama. ¹⁰ Imanka rrankarra itja Altjirraka worla naka. Lyarta pula rrankarra worla ekura namantama. Imanka Altjirranha rrankangkarra itja montjamontja ntelalhaka. Lyarta pula era rrankangkarra kala montjamontja ntelalhakantama.

Relha Lorinya ntjarranga urlarra arratja ntelalhitjika

¹¹ Tjina kangkintja ntjarrai, rrankarra relha epinya, ankealtha turta namanga, atha rrankarranha lakinha tjatjatuma. Rrankarra itja lherrintja korna rrakangkarranhaka kangkweritjika, rrankarra kornilalhakitja. ¹² Relha Lorinya ntjarranga urlarra rrankarra kutatha arratja ntelalhitjika. Nthurra Relha Lorinya etna angkama rrankarra kula relha korna namanga. Etna paka aramanga rrankarra arratja kuta ntelalhamanga, etna turta Altjirranha anma tnantjitjina, era pitjalpumalanga relha ingkarrakanha tjperrawutjika.

Itornka ntjarraka arratja ntelalhitjika

¹³ Inkartakakwia, rrankarra itja relhaka mpaarangeranga marranga kekartalhitjika. Government tjitjarta kngarra ekura kangkwerrai. ¹⁴ Itornka etnaka turta kangkwerrai, etnanhala tjitjarta kngarrala ingkairnakala. Era kunha etnanha ingkairnakala relha korna ntjarranha rrarrathala tutjika, relha marra ntjarranha turta tnantjitjika. ¹⁵ Altjirranha kunha antja nama rrankarra lakinha ntelalhitjika, rrankarra relha kotna ntjarranha tjukunyilitjina, etnala rrakangkarriperra paala angkamanga. ¹⁶ Arai, rrankarra Altjirra ramarama namanga, Kristala rrankarranha althakalthilakala. Rrankarra pula kalantema Altjirra kangkweritjika, relhaka mpaarangeranga maraka turta. ¹⁷ Rrankarra relha ingkarrakiperra

marra eteritjika. Rrangkarra tjina tnakanhakanha ingkarrakaka kangkitjika. Rrangkarra Altjiranga treritjika. Rrangkarra Government tjitjarta kngarra ekuriperra marra eteritjika.

Urrkapunhapunha ntjarra arratja ntelalhitjika

¹⁸ Relha urrkapunhapunha ntjarrai, rrangkarra itornka rrakangkarranhaka arratja eteritjika, etnaka kangkwerritjika turta. Rrangkarra itornka alknarnterranha ntjarraka turta kangkwerritjika, itja itornka marra ntjarrakanta. ¹⁹ Thunga itornka

rrakangkarranhala rrangkarranha palkala wara tuma. Rrangkarra turtantama Altjirranha etarlaramala kunpa nyingalauwuma. Nhanha marra nama. ²⁰ Thunga pula

itornka rrakangkarranhala rrangkarranha tuma, rrangkarra korna urrkapukalanga. Rrangkarra turtantama kunpa nyingalauwuma. Rrangkarra yarna tnakalhama. Rrangkarra pula kunpa nyingalauwumanga, rrangkarra marra urrkapukalangatanya, nhanhaka Altjirranha kangkamala. ²¹ Arai, Altjirrala

kunha rrangkarranha urraraka kunpa nyingalauwutjika, Kristanha rrakangkarra nyingalauwukalanga. Rrakangkarrathaka turtantama nama ekuranga ingkapala lhitjika.

²² “Kristanha itja kuta korna ntelalhaka, orrtjerramala paka angkaka.”

²³ Etna erinha iltamalanga, era etnanha itja kapanha iltaka. Era nyingalauwumalanga, era itja angkaka etnanha kapanha tutjika.

Era kala nhanha Altjirra ekura impuka, erala relha ingkarrakanha arratja tjiperrawutjinala. ²⁴ Kristanha ntolkala iluka. Altjirralla kunha erinha rrarrathala tuka, nurna korna ntelalhakalanga. Nurnantama itja wotha lherrintja korna nurnakanhaka kangkwerritjika. Nurna kala arratjantantama ntelalhitjika. Ilumala era rrangkarranha marrilaka. ²⁵ Arai, rrangkarra kunha sheep paalapaala nthumala ntjarra ngerra nitjata. Lyarta pula rrangkarra tnairnarintja pa ntarntarintja rrakangkarranhurna toperrakala.

3

Noarta urlarrakurlarra kangkintja ntelalhitjika

¹ Arrkutja ntjarrai, rrangkarra artwa noa rrakangkarranhaka kangkwerritjika. Thunga artwa noa unkwanganhala Yia Marra erinha itja tnakama. Era pula aramalanga unta ekura kangkwerramanga, thunga era turtantama Altjirranha tnakitjina. ² Era Altjirranha tnakitjina, era arakalanga unta Altjirraka eterramanga, arratja kuta ntelalhamanga turta. ³ Arrkutja ntjarrai, rrangkarra itja mpurrka rrakangkarranha kngarra inthorra intortilitjika, irna gold-aka ekarralhamala, mantarra ntjatjintja inthor-rakalka irrpumala. ⁴ Altjirranha kngarralkura antja nama rrangkarra arratja eterritjika, kangk-intja, rilhera turta ntelalhitjika.

⁵ Arai, imanka, arrkutja alkngaltara ntjarrala Altjirranha tnakaka. Etnantama

intortilalhitjata ngerra, artwa noa etnakanhaka kangkwerramala. ⁶ Lakinha Sarah-anha Abraham-aka kangkwerraka, erinha itornka kamala. Rrangkarrantama Sarah-aka kwarra ntjarra nama, rrankarra paka arratja kuta ntelalhamanga, itja turta trerramanga.

⁷ Artwa ntjarrai, rrankarrataka noartaka kangkintjiperra arratja eterritjika. Etarlarai, noa unkwanganha itja unta ngerra ekarlta nama. Nhanha turta. Mpala tharrantema kunha kaaralhamana Altjirralela ngampakala etatha nitjika. Lakinhangana urlarrakurlarra kangkintja ntelalharrai, Altjirrala turtantama mpalanha wutjinanga, mpala ekururna ingkamalanga.

Kunpa nyingalauwai, etna rrankarranha pal-kala rrukunthakunthilamanga turta

⁸ Kala nanhantama. Rrankarra ingkarraka urlarrakurlarra rilhera ntelalhitjika. Rrankarra tjina tnakanhakanhaka ilpangkitjika, etnaka kangkitjika, etnaka konyerritjika, etnakalela arratja kerrintja nitjika turta. ⁹ Relha arrpunhala paka rrankarranha kornilamanga, rrankarra erinha itja kapanha kornilitjika. Arrpunhala paka rrankarranha iltamanga, rrankarra erinha itja kapanha ilitjika. Rrankarra ekururna angkatja marratitja angkitjika. Arai, Altjirrala kunha rrankarranha urraraka, rrankarranha lyekarrilitjinala. ¹⁰ Nhangana Altjirrala Angkatja Imankinyala ilama,

“Unta etatha marraka antjama nama?

Unta arrkana nitjika antjama nama?

Kurunga unta itja relha arrpunhiperra

korna angkitjika,
orrtjerritjika paka.

¹¹ Unta kornanga toperritjika,
arratja turta ntelalhitjika.

Unta arrkarnalhitjika rilhera nitjika,
relha arrpunhalela rilhererritjika turta.

¹² Arai, Ingkartala kunha relha arratja
ntjarranha ntarntarama,
era turta etnanha wuma, etna ekururna
ingkamalanga.

Kanha relha korna ntjarraka,
Ingkartanha antjakunyala nama.”

¹³ Ngunhalama rrangkarranha kornilitjina,
rrangkarra paka thakerramanga marra
ntelalhitjika? ¹⁴ Rrangkarra pula nthurpa
nyingalauwumanga, rrangkarra marra
ntelalhakalangatanya, Altjirrala rrangkarranha
lyekarrilitjina. Lakinhanganya rrangkarra itja relha
arrpunhanganya trerritjika, tnoatnoa kuta pula
nitjika. ¹⁵ Kala Kristakanta eterrai, ekura turta
kangkwerrai.

Relha arrpunha ntjarrala paka rrangkarranha
pmarramanga, “Iwunhangama rrangkarra
Kristanha ekarlta kuta tnakama?” etnanha
kunpala ilai, angkatja marrala, pulyapulyala
turta. ¹⁶ Itja etnaka alkngarnterritjika.
Kurunga relha etna porerritjina, etnala
rrakangkarriperra lhurkurta angkamanga,
rrangkarra Kristaka kangkwerramanga. ¹⁷ Arai,
Altjirranha paka antja namanga rrangkarra
nyingalauwutjika, nhanha marralkura nama
rrangkarra nyingalauwutjika rrangkarra
arratja ntelalhakalanga, nhanhangatjina,

rrangkarra nyingalauwutjika, rrangkarra korna ntelalhakalanga. ¹⁸ Arai, Kristanha nyintaranga kuta iluka, korna nurnakanhakakwia. Artwa arratja era, relha ilkarrtja ntjarrakakwia. Lakinha era nurnanha Altjirraka tjinilaka. Etna Kristanha errilknga tuka. Altjirrala pula enka ekuranha etathilaka.

¹⁹ Kurunga Kristaka enkala Yia Marra erinha relhaka enka ntjarranha kaltjinthaka. Relhaka enka nhanha etnataka jail-ala ngerra naka. ²⁰ Relhaka enka nhanha etnataka imanka nhanga Altjirraka irrpaltherrakala, Altjirranha etnaka montjamontja ntelalhamangatanya. Nhanha lakinha nakala artwa Noah-aka antalala, Noah-ala ship kngarritja nhanga itamalanga. Ship nhanha ekuralantama Altjirrala relha 8 tangkalhelaka, kwatjala.

²¹ Kwatjalala etnanha tangkalhelakala ngerra, lakinha kwatjala nurnanha turta tangkalhelaka, etna nhanga nurnanha kaltjirrpulhelamalanga. Etna nurnanha kaltjirrpulhelamalanga, kwatja era itja mpurrka nurnakanha ilknigika, ulpurtanga. Altjirrala pula nurnanha ilknigika, korna nurnakanhanga. Nhanha lakinherraka Jesua Kristanha relha errilknga ntjarranga etatha kamerrakalanga.

²² Jesua Krista era kala alkirurna alpuka, era turtantama Altjirraka akwala nama. Lyarta angel ntjarra, errintja ntjarra, relha itornka ntjarra turta ekurantama kangkwerrama.

4

Rrangkarranha kaltjirrpulhelakalanga, kala

arratjanta ntelalhai

¹ Kristanha nyingalauwuka, iluka turta, era alhala namalanga. Rrangkarra turtantama antja nitjika ekuralela ilutjika. Arai, relha erala ilukala, era itja wotha korna ntelalhama.

² Lakinhanganga rrangkarra itja wotha lherrintja korna rrakangkarranhaka kangkwerritjika, Altjirraka pula kangkwerritjika.

³ Arrkurla nhanga rrangkarra Relha Lorinya ntjarra ngerra ntelalhitjata. Rrangkarra korna mpaaritjata. Rrangkarra lherrintja kornaka kangkwerritjata. Rrangkarra drunk-erritjata. Rrangkarra ntaiyawutjata, kwapakwapala ilkutjata, orrtja altjirraka urrkurrkintja nitjata turta.

⁴ Lyarta Relha Lorinya ntjarra tnolkamantama rrangkarra itja wotha etnakalela porta korna ntelalhamanga. Etna turta rrangkarranha arrampowumantama.

⁵ Anma Altjirralla relha etatha ntjarranha, relha errilknga ntjarranha turta tjiperrawutjina. Kurunga era relha nhanha etnanha turta tjiperrawutjina, etnala rrangkarranha arrampowukala.

⁶ Tnakanhakanha arrpunha ntjarralla kala Yia Marra erinha relha ntjarranha kaltjinthaka. Relha etnala Yia Marra erinha wukala, etnakanga urrputja anma iluka. Etna iluka nhanha relha ingkarrakakathaka namanga warta. Altjirralla pula relha nhanha etnanha anma tjiperrawutjina, etna turtantama ekuralela etatha nitjinanga.

Altjirralla alha nhanha kala yirralhelitjiker-rama

⁷ Arai, Altjirrala kala relha, alha, alkiralka yirralhelitjikerrama. Lakinhanganga rrangkarra itja parrpartilalhitjika. Rrangkarra pula arratja kuta eteritjika, rrangkarra arratja kuta Altjirruna ingkitjinanga.

⁸ Altjirranha kngarralkura antja nama rrangkarra urlarrakurlarra kangkintja ntelalhitjika. Arai, relha kangkintja itja parrpa yirrkngerrama, relha arrpunha ekura yirrkngerramanga, erinha iltamangalka paka.

⁹ Tjina tnakanhakanha paka pmara arrpunhanganga pitjikalanga, erinha kangkintjala ntangkai yatjarra nitjika, erinha marna turta nthai.

¹⁰ Altjirranha rrakangkarra nyintaminyintaka ngwanga ntelalhaka. Erantama antja nama rrangkarra urlarrakurlarra tangitjala nitjika.

¹¹ Nhanganga lakinha ngerrakwia. Ungkwanga paka linya marra namanga, arrpunha ntjaranaha Altjirra Angkatja arratja kaltjinhai. Ungkwanga paka intamanga relha arrpunhanha turta nthitjika, erinha kala nthai. Lakinha ntelalhitjika kunha Altjirrala nurnanha ekarltilama. Kurunga relha arrpunha ntjarrala nurnanha aramalanga lakinha ntelalhamanga, etna Altjirranha tnantjitjina Jesua Kristarlarlanga. Altjirra era kunha makalaria nama, ekarlta inthorra turta, ngampakala. Amen.

Unta tnakanhakanha namanga, unta itja tnoakitjika unta Kristakakwia nyingalauwumanga

¹² Tjina kangkintja ntjarrai, rrangkarra kunha lyarta ilkaartintjimala nyingalauwuma. Rrangkarra pula itja nhanhiperra tnoakitjika.

Altjirralataka rrangkarranha arrkarnama. ¹³ Arai, rrangkarra kala arrkana nitjika, rrangkarra nyingalauwumanga Kristanhala nyingalauwukala ngerra. Anma Kristanha pitjalpumalanga, makalaria inthorra, rrangkarra arrkana inthorra nitjina.

¹⁴ Etna paka rrangkarranha arrampowumanga rrangkarra Kristanha tnakamanga, Altjirrala rrangkarranha lyekarrilitjina. Arai, relhala rrangkarranha arrampowumanga, nhanhala ntelama Altjirraka Enka makalaria era rrakangkarralela namanga. ¹⁵ Rrangkarra pula nyingalauwumanga rrangkarra relha arrpunhanha errilknga tukalanga, arrpunhaka yultha paka nyilkngala inakalanga, yia orrtjerramala angkakalangalka paka, Altjirrala rrangkarranha itja lyekarrilitjina. ¹⁶ Rrangkarra pula nyingalauwumanga rrangkarra Kristanha tnakamanga, rrangkarra itja errakarrerritjika. Altjirranha tnantjaititja, rrangkarra katjia ekuranha namanga. ¹⁷ Arai, Altjirrala kala relha ntjaranhanha tjiperrawutjikerrama. Erantama worla ekuranhakimparra tjiperrawutjina. Kurunga era arrpunha ntjaranhanha tjiperrawutjina, etnala Yia Marra ekura itja kangkwerrakala. Relha nhanha etna iltjalai erritjina. ¹⁸ Altjirraka Angkatja Imankinyala ilama,

“Relha arratja era kaltja Altjirralanta erinha irrpalthala tangkalhelama. Ngunhalantama relha erinha tangkalhelitjina, erala Altjirraka antjakunya namanga, ekura irrpaltherramanga turta?”

¹⁹ Thunga Altjirranha antja nama unta nyin-galauwutjika. Unta itja ekuranga kekarta lhitjika. Altjirra erala nganha arrpmarnakala, erinha ekarlta kuta tnakai, kangkintja turta kuta ntelalhai.

5

Peter-ala ntarntarintja ntjarranha tjatjatuka

¹ Ntarntarintja ntjarrai, yinga turta ntarntarintja namantema. Atha Kristanha nyingalauwumalanga araka. Yinga turta anma ekuralela nitjina, pmara makalaria ekuranhala.

² Ntarntarintja ntjarrai, Altjirralla kunha rrankarranha worla ekuranha lantbaka, tnairnitjika. Athantama rrankarranha tjatjatuma, rrankarra Altjirraka worla arratja tnairnitjika. Rrankarra etnanha arrkanala tnairnitjika, Altjirranha etarlaramala, itja arrpunhala rrankarranha turnakalanga. Rrankarra etnanha kangkintjala tnairnitjika, itja money-akatjila.

³ Rrankarra etnanha montjala tnairnitjika, itja etnaka tjitjarterramala. Rrankarrataka etnaka tjaiya imarnitjika ngerra, rrankarrarrpa arratja ntelalhamala. ⁴ Kurunga tnairnarintja kngarra era pitjimalanga, era rrankarranha kwartiwutjina. Rrankarrantama ekuralela ngampakala etatha nitjina.

Peter-ala worlamparinya etnanha tjatjatuka

⁵ Artwa nthitja ntjarrai, rrankarra kngarripata ntjarraka kangkwerritjika. Worlamparinya ntjarrai, rrankarra ingkarraka urlarrakurlarra

porapora ntelalhitjika. Altjirraka Angkatja Imankinyala ilama,
 “Relha erala tjurnalhama, ekura
 Altjirranha irrpaltherrama.
 Kanha relha erala porapora ntelalhama,
 ekura Altjirranha ngwangala ntelalhama.”

⁶ Lakinhang, Altjirraka rrangkarranha lyarta rrukunthakunthilamanga, rrangkarra itja eku-ranga kekarta lhitjika. Anma, arlta erala ar- rkurla kuta eterrakalala, era kala rrangkarranha wotha arrkanilitjina. ⁷ Rrangkarra imampurla namanga, nakapakarla paka, nhanha kala Altjirraka alpmelai, ekururna ingkamala. Era kala rrangkarranha eterrama, era rrangkarranha ntarntaritjina turta.

⁸ Rrangkarra arratja eterritjika. Rrangkarra itja kunpakunperritjika. Arai, leltja rrangkarranha, errintja era, erataka lion ngaiyala ngerra nthulapuma. Era relhaka yonthama, erinha kala kwarnitjinala ngerra.

⁹ Erinha parrai, Altjirranha ekarlta kuta tnakamala. Etarlarai, errintja era kunha tjina tnakanhakanha rrangkarranhanaka pmarar-rpaninhala, lakinhantema irrpaltherrama. Lakinhang, etna turta nyingalauwumantema.

¹⁰ Altjirraka rrangkarranha Krista Jesuarlarlangu urraraka. Era turta rrangkarranha irrpalthala ntarntarama, rrangkarra imampurla namanga. Rrangkarra kala kurrka wara nhanhala nyingalauwutjina. Kurunga era rrangkarranha lyartinyilitjina, marrilitjina, ekarltilitjina, pmara makalaria ekuranhaka turta arrarnitjina.

¹¹ Lakinhang, nurna Altjirranha tnantjitjika, era

warta Ingkarta kngarra namanga ngampakala. Amen.

Anparnintja

¹² Silvanus ilirna pepa kurrka nhanha rrankangkarra yairnama. Nukanga urlarra Silvanus era tjina tnakanhakanha ilporatha nama. Yingataka antja naka rrankarranha tjatjatutjika, rrankarranha ilpangkalhelitjika turta, Altjirranha nthurpa ngwanga namanga. Rrankarra nhanha ekarlta kuta tnakitjika.

¹³ Worlamparinya etnala Babylon-ala namanga, etna rrankarranha anparnama. Worlamparinya nhanha etnanha kunha Altjirrala urarakala, erala rrankarranha urarakala ngerra.

Worra nukanha Mark-ala turta rrankarranha anparnamantema.

¹⁴ Rrankarra tjina tnakanhakanha rrankarranha, tjia ngerra kwakitjikitjika.

Altjirranha rrankangkarra rilhera ntelalhama, rrankarra Kristalela nyinterrakala namanga.

**Altjirraka angkatja - Arrarnturna
kngartiwukala
The New Testament in the Western Arrarnta
language of Australia**

copyright © 1997 Bible Society of Australia

Language: Western Arrarnta (Arrarnta, Western)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-05-14

PDF generated using Haiola and XeLaTeX on 11 Nov 2022 from source files dated 22 Nov 2019

e7dac67a-727e-547f-9edb-55e6c28bb3b9